

A colloquio cor coronavirus.

Carissim coronavirus,  
a ta parli e ta schivi, 'carissim' mia nel senso da vorét ben, ma da 'cosctoos'  
pai mort che tè fai e che ta se dré a faa, e i contagiaat  
carissim pai dagn che tè già combinaat, in di gent e in d'economia.

Te fai balaa oscpedaa, dottor e infermee, te fai cor i militar  
come sa füdesa na guera, e na guera l'è, contra i nos polmon  
te scbatü in letargo i vecc, terza e quarta età senza distinzion

te monopolizaat radio e television. Se chesta lè mia na guèra, lè na  
rivoluzion. I nos aerei jeva nai in grounding par forza...  
ti invece prima ta ie metüt a tèra par pöö svödag ra borsa

E nüm che ma piaseva brasciass, e naa a balaa em finii da scmorosaa  
sotto vuoto ta ghee impachetaa, e lì' par chisà quanto temp  
ammo' a devom sctaa.

Ma mi vöresi savee cosa tè saltaat in ment da rivaa scia fin chi  
a meteg adoss a tüt or mond, chi prima chi dop  
tüt chel scompiglio lì. L'è mia par cas che ta se sctai pagaat

d'ona quai fabrica da savon, mascherin, disinfetant e rescpiradoo?  
Par fortuna ch'evom proibit or burqa, ma come andarem  
a scont ra faccia fra un poo a vedarem pöö.

A sctavet mia ben denta in do pipistrell, a sevet mia content lì?  
Che bisögn a ghevet da saltag adoss a un pangolino e pare anca a 'n  
serpent e pöö faa razzia in di gent, is ciama 'imperialistci' i tipi come ti.

In ogni caso ta se mia stüpit, tè imparaat ischvelt ra lezion  
in cinq e tri vott tè metüd in pratica ra globalizazion.  
E dess scta mia lì impalaat cora corona a dondon ...

e parla püse fort, cat senti mia e dimm i to réson.  
Ah, ho capiit, in di pipistrel l'eva pù possibil sctaa  
ormai jeva trop stressaa e t'è dovü emigraa

eh sì, iè preoccupaat par i speci in estinzion, i macelli umidi, i megaincendi  
e ra deforestazion, che i soleva di grant füm e di grant polveron  
e par nüm virus l'è na pacchia e na grant tentazion ...chela da l'evasion.

I velen ca gira e i scempi in terra, in aria in acqua, r'ambient squilibraat  
(lè sèè men d'on grado par scaldaa i fiüm ca va'n do mar), par proliferaa  
em dovü scapaa föra do pipistrell a gamb levaa, e come in ogni crisi

anca nüm em trovaat un'opportunità da cres, da ciapaa tütchel  
ca podevom ciapaa, par rivaa ar nos element  
indoa a sguazzom content, ca l'è r'inquinament.

E sa 'ndèe in avanti inscì, av consigli da sctaa atent  
A sareem nüm virus i padron do mond, gent! A sii dré provaa  
seca lè na pandemia, e sctèè in campana, se un'altra ara vöri mia.

Oh car Signor, virus, chi bei ropp lì, cüntomei mia sü  
domaa a mi, tücc quaicos a devom faa, ma sperem chi riva in alt, a chi ca  
tira i fir e i ciapa i decision do tipo da scvilüpp e da prodüzion, e ai ditt  
che in gir par mond i fa or brütt e r catif temp, obligai a riscpetaa  
r'ambient.